



Israël murmure contre Moÿse au desert, où Dieu enuoye la Manne du Ciel, que le peuple recueillit par chacun iour, horsmis celuy du Sabbath.

LE quinzième du second mois après la sortie d'Égypte, les Israélites partirent d'Elim pour venir au desert de Sin, assez près du mont Sinai. Or ce peuple famelique murmura contre Moÿse & Aaron, disant à nostre vouloir que nous fussions morts en Égypte, où nous estions près les potées de chair, & mangions nostre saoul de pain; & nous sommes icy mourans de faim. Adonc le Seigneur dist à Moÿse, Je feray pleuvoir du pain du Ciel, & le peuple le recueillira de iour en iour tant qu'il suffira, afin que ie le tente s'il chemine en ma Loy, ou non: Mais au sixième qu'il en recueille au double. Moÿse donc aduertit Israël du vouloir du Seigneur, & que sa gloire seroit veüe, & leur dist, Vous murmurez contre Dieu qui vous a fait tant de biens, il vous donnera de quoy vous contenter: & la congregation vid la gloire du Seigneur en vne nuée, lequel leur fit monter telle quantité de cailles, qu'elles courirent l'armée. Et au matin la rosée estoit à l'environ d'eux, & quand elle eut couuert la terre, voicy venir parmy le desert vne petite chose ronde comme coriandre: Ce que voyant les Israélites, dirent l'un à l'autre, Manhu, qui signifie, qu'elle chose est-ce là? Et Moÿse leur dist, C'est le pain que Dieu vous enuoye, defendant d'en recueillir que ce qui peut suffire pour vn iour, & non plus.